

Pelajar UM, USIM unggul debat bahasa Arab di Qatar

SEREMBAN 4 Mei - Dua pelajar dari universiti tempatan melakar sejarah tersendiri apabila mengharumkan nama negara selepas tersenarai sebagai tiga pendebat terbaik keseluruhan dalam *International Arabic Debating Championship* (IADC) yang berlangsung di Qatar baru-baru ini.

Pelajar Universiti Malaya (UM), Azwan Kamarudin, 25, dan pelajar Universiti Sains Islam Malaysia (USIM), Anis Amirah Zakaria, 22, masing-masing menduduki tempat pertama dan kedua kategori pendebat bukan penutur jati bahasa Arab dalam pertandingan itu.

Pertandingan yang berlangsung pada 26 hingga 29 April lalu bertempat di Qatar National Convention Centre membariskan lebih 300 pendebat universiti terpilih dari negara Arab dan bukan

Arab.

Anis Amirah yang merupakan pelajar tahun tiga Fakulti Syariah dan Undang-Undang, USIM, ketika ditemui berkata, kejayaan yang dirangkul itu adalah pencapaian terbaiknya dalam kejohanan debat antarabangsa.

"Saya menyertai debat bahasa Arab sejak sekolah lagi ketika menuntut di Kolej Sultan Alam Shah (Kisas). Ini memberi motivasi yang tinggi kepada saya untuk terus menguasai bahasa Arab dengan lebih mendalam.

"Peluang yang diberikan USIM untuk ke Qatar ini amat saya hargai dan berharap saya dan pasukan debat bahasa Arab USIM diberi peluang menyertai pertandingan kompetitif sebegini di masa hadapan," katanya di sini kelmarin.

Menyentuh mengenai ke-

mahirannya menguasai bahasa Arab, Anis Amirah menjelaskan, amalan kerap membaca al-Quran dan sentiasa meletakkan keinginan yang tinggi untuk mempelajari bahasa Arab merupakan rahsianya.

Malah katanya, dia sentiasa mencabar diri untuk menjadi yang terbaik dalam setiap pertandingan debat disertai.

Pertandingan dwitahunan yang memasuki edisi ketiga sejak dianjurkan pada 2011 dinaungi oleh Timbalan Presiden Yayasan Qatar, Syeikh Hind Hamad Al Thani.

Kejohanan yang berlangsung selama empat hari itu bertujuan menggilap potensi peserta melalui budaya diskusi dan debat bagi membentuk masyarakat global dan melahirkan pemimpin masa hadapan.



ANIS AMIRAH ZAKARIA (kanan) bersama rakan-rakannya yang turut menyertai *International Arabic Debating Championship* di Qatar, baru-baru ini.